

Inuussutissalerinermut uumasullu nakorsaanut oqartussaaffiup tigunissaanut alloriarnissap tullia suusanersoq pillugu apeqquteqaat aallaavigalugu oqallisissiasatut siunnersuut.

(Inatsisartunut ilaasorta, Aqqalu C. Jerimiassen, Atassut)

Akissuteqaat

(Aalisarnermut Piniarnermullu Naalakkersuisoq)

Aqqalu C. Jerimiassen, Atassut, apeqquteqaat aallaavigalugu oqallittoqarnissaanik siunnersuuteqarsimammat Naalakkersuisut sinnerlugit qutsavigissavara.

Umasut nakorsaqarnermut inuussutissalerinermullu oqartussaaffiup akisussaaffigineqalernissaanut apeqqut naalakkersuinikkut qangali eqqartorneqartarsimavoq. Uumasut nakorsaqarnermut inuussutissalerinermullu oqartussaaffiup Danmarkimi tiguneqarnissanut ingerlariaasissamik suliaqartussamik naalakkersuisoqarfiit akimorlugit suleqatigiissitaliortoqassasoq Naalakkersuisut 2022-mi aalajangiippat. Suleqatigiissitaliaq immikkoortup iluatsittumik tigunissaanut suliaq ingerlanissaanik allaaserinniffiusumik nalunaarusiorpoq.

Massakkut suliaasaqarfimmi tassani suliasat Kalaallit Nunaannit Danmarkimillu avillugit suliarineqartarput. Inuussutissalerinermut tunngatillugu nunatsinni namminermit tuniniarneqartussanik nioqqutissiorneq nunatsinnit oqartussaaffigineqarpoq, tassa imaappoq nunatsinni namminermit tuniniarneqartartussanik nioqqutissiornermit maleruagassat atuutsinneqarneri 1998-imiilli nammineq aalajangersaaffigisinnaalernikuuagut. Danmarkip nunanut allanut nioqqutissiarineqartartut oqartussaaffigai ilaatigullu nunat tunitsivigineqartartut niuernikkut isumaqatigiissuteqarfigineqarnissaat kiisalu nioqqutissianik Kalaallit Nunaaneersunik eqqussuinermit EU-mi maleruagassat malinneqartarnissaat isumagisaralugu.

Nunarput eqqarsaatigalugu aalisakkanik aalisakkanillu tunisassianik avammut nioqquteqartarnitsinni suliaasaqarfik eqqartugarput pingaarutilerujussuuvoq. Taamaattumik suliaq ingerlanerata nalaanni tigusinerullu kingorna avammut nioqqutissiorarneq ingerlatiinnarsinnaaqullugu tigusinissamat suliaq eqqortumik ingerlanneqarnissaa pingaaruteqarpoq.

Suleqatigiissitaliaq qulaani taaneqartup uumasut nakorsaqarnermit inuussutissalerinermillu akisussaaffimmik tigusinermut pisariaqartunik inatsisilerinermi, allaffissornermit piginnaasatigullu taakkulu aningaasatigut kingunissaat naatsumik allaaserai, tamanna tunngavigalugu uumasut nakorsaqarnermit inuussutissalerinermillu akisussaaffimmik tigusinermit politikkikkut suliamik ingerlatsineq allaaserisinnaajumallugu. Suleqatigiissitaliaq inassuteqarpoq Namminersorlutik Oqartussat aamma Qallunaat Nunaanni Fødevareministeriap akornanni atorfilinnik Danmarkimi ministeriaqarfiit aamma Kalaallit Nunaanni naalakkersuisoqarfiit suliamut attuumassuteqartut peqataatillugit suleqatigiissitaliortoqassasoq. Suleqatigiissitaliaq taassuma ilaatigut suliamik ingerlatsinermit Danmarkimi oqartussat aningaasatigut pisussaaffiisa annertussusiata

nalornissutigineqarsinnaanera pillugu sukumiisumik nassuiaasiussaaq, taannalu Kalaallit Nunaanni tigusinissamik inaarutaasumik isummernissamut tunngaviussaaq.

Suleqatigiissitaliap aamma inassutigaa, Nuummi Kalaallit Nunaanni avammut tuniniaanermut immikkoortortamik pilersitsinissaq pillugu Danmarkip naalagaaffianik oqaloqateqarneq piaarnerpaamik aallartineqassasoq, taamaalilluni avammut tuniniaaq pillugu aalajangiisinnaaneq Danmarkimit Kalaallit Nunaannut nuunneqassalluni. Immikkoortortaqarfimmi avammut tuniniaasinnaanermut akuersissutit il.il. suliarisarnerisa saniatigut inuussutissarsiutinut aamma Kalaallit Nunaanni inuiaqatigiinnut iluaqutaasumik avammut tuniniaanermi kalaallinik sulisunik ilinniartitsisoqassaaq.

Nalunaarusiaq piareeripat Naalakkersuisullu suleqatigiissitaliap inassuteqaatai isummerfigereerpatigit, Naalakkersuisut Inatsisartuni ataatsimiititaliat suliamut attuumassuteqartut suleriaqqinnissaq pillugu ilisimatissavaat. Tigusinissaq pillugu suliap aallartinnissaa Inatsisartut aalajangeereerpata aatsaat pisinnaavoq.

Naalakkersuisuniit taamatut oqaaseqarluta Inatsisartut oqallinnissaat qilanaaraarput.